

Date – 09/09/2024

Time - 18:30 -18:40Hrs

## REGIONAL NEWS BULLETIN

### HEADLINES (EVENING)

1. **Bekang Um ei sual avangin Saitual District Hospital-ah puitling 19 vawiin khan damdawiinah dahluh an ni.**
2. **Ziak leh chhiar thiam tura khawvel pum huap hmalakna, "International Literacy Day" pualin vawiin hian Mizoramah hun hman a ni.**
3. **Prime Minister Narendra Modia chuan vawiin khan New Delhi-ah Abu Dhabi Crown Prince a kawm**
4. **Supreme Court chuan Kolkata RG Kar Medical College and Hospital-a pawngsual leh inthahna thubuaiah CBI chu report thar tun thla ni 17 hmaa thehlut turin a hriattir.**

<><><>

### FERMENTED BEANS POISONING

**Bekang Um ei sual avangin Saitual District Hospital-ah puitlingi 19 vawiin khan damdawiinah dahluh an ni.**

Saituala kan corr sawi danin, Bekang um neitu leh zuartu Pi Lalhmunhloi Police Veng Keifang chuan Bekang um hi ni 7 Inrinni khan thenawm khawvengah a tih thin dan pangngaiin a zuar chhuak a, amah hi Bekang um thang, thla khatah vawi 2 vel emaw zuar chhuak ziah thin anih avangin thil danglam thleng turah a lei thangte pawh hian an ngai lova, Inrinni tlai leh zan lamahte Bekang leitute zingah kawthalo, khawsik leh pumna te an awm tak avang leh a zuartunu ngei pawh hi inrinni zan hian pumna avangin a mu mang lova, nimin Pathianni khan bekang ei sual an ni tih an la inhriat thiam hlawm loh avangin mahni inah an theih angin an inenkawl hlawm a, Vawiin t hian a na zualten Saitual Damdawi In panin bekang um ei sual an ni tih hriat a ni ta a ni.

Chanchin buatsaih lai han mi 19 Damdawi Inah admit niin, damdawi in pan zawng zawng hi khumin a daih loh avangin a ziaawm deuh, haw tir leh pawh awmin kal belh mek an awm bawk a. Admit zingah chau zual awm mahse hmunpui lama refer an awm hrih lo. Hetihlai hian Inrinni tuka bekang ei zingah insawiselna nei lem lo pawh an awm niin thu dawn a ni bawk.

Bekang um sa leh a hum hi vawiin vek khan a sample lak niin Aizawl Civil Hospital Mirobiology Deptt-ah endik turin thawn a ni.

Bekang hi a umtu hian a hum a lei thanna, Buhban khuuaa a laizawnnu thar a nih thu leh, hetiang hi a vawi khat tawna a nih thu a sawi.

<><><>

## SUPPLY MINISTER

Food Civil Supply & Consumer Affairs Minister Pu B Lalchhanzova chuan, Rethei ngaihsaktu party an nihna chu Ration Card thlanna hmanga lantir an tum thu leh ngaihsaktu nei ve loten ZPM rei tak atanga an lo nghahna chhanna tur a ni, a ti.

He thu hi vawiina ZPM Party Office-a an party chung inkhawmah sawiin, Supply Minister chuan Retailer lawman pawh pawisa 50 atanga cheng1.50-a an tih san tur thu sawiin, Aizawl bikah chuan hei hi October atanga hman tan an tum thu a sawi a, Retailer te chu dik taka buk tur leh Mizoram chu buk dik zalenna rama siam an tum thu a sawi.

A sawi danin, Aizawl khawpui chungah Ration Card 73,110 a awm a, Ration Card-ah mihring 3,12,125 an in ziaklut a ni. Card eng ti a sawi thin AAY Card-ah mihring 9,129 awmin card 3,286 a awm a , Card pawl-ah mihring 1,35,178 awmin Ration Card 31,965 a awm a, Card var-ah mihring 1,67,746 an awm a, ration card 37,831 a awm a ni.

Tun dinhmunah Aizawla veng 83-ah Retailer 153 an awm mek bawk a, Minister chuan Ration card hrang hrang, a hmangtu tur dik takten an hmang em tih pawh veng tin a Food Security Committee-ten an zirchian tur thu te leh Food Security Committee-te pawh DCSO kaltingin an zirchian tur thu a sawi a, Food Security Committee-te zingah mi rethei hlamchhiah an awm em tih chu an thupui ber a nih dawn thu leh, a titha lo veng an awm em tihte thlengin an enfiah dawn a ti.

Supply Minister chuan Food security kalpui a nih dan chungchangah a teh dan tur pawh an duanfel vek tawh thu sawiin a ti tha lo veng leh ti tha vengte pawh an puan mai theih tur thu a sawi bawk.

<><><>

## INTERNATIONAL LITERACY DAY

Ziak leh chhiar thiam tura khawvel pum huap hmalakna, "International Literacy Day" pualin Aizawlah Directorate of School Education chuan hun a buatsaiha , Pu T. Lalhlipua MLA chuan a hmanpui.

Thusawiin Pu T.Lalhlipua chuan Mizoram chu ziak leh chhiar thiamna lamah hma a sawn nasa em em a; A Aw B hman atanga Kum-100 chungin India ram state zinga a sang ber dawttu a ni thei a. Ziak leh chhiar thiamna lama hmasawnaah Mizo mipui tlawngai pawl - Zirtirtu, Kohhran leh Sorkar-te thawhona zar a ni a ti.

Pu T.Lalhlimpuia MLA chuan Ziak leh Chhiar thiamna hi India ram mai ni lo, khawvel ram dang pawhin an ngaih pawimawhna chhan chu hmasawna bulpui a nih vang a ni a ti a, Mizoram hi financial year 2023-2024 chhunga zaa za ziak leh chhiar thiam state ni thei tura Ministry of Education-in a beisei zingah a tel a, hemi tihlawhtling tur hian Mizoram Sorkar-in hma a la mek a, Mizoram pum huap Survey pawh neih a ni tawh a ni, a ti.

He programme hi Pu Lalhmachhuana, Additional Director, School Education Department Mizoram chuan a kaihruai a ni.

Champhai ah chuan District Programme Office, Women & Child Developmentbuatsaihin International Literacy Day hi CHANEM BUILDING ah hman a ni a. Champhai Bawrsap Pu VL Remliana chuan a hmanpui.

Pu VL Remliana chuan thu sawiin zirna chu Mizote hnenah chanchintha hmangin pek a ni a, hei hian hmasawna nasa tak a thlen a, Ziak leh chhiar thiamnain a tum ber chu finna, changkanna dik leh remhriatna nih thu pawh sawiin Bawrsap chuan zir lai kalkhawmte chu an thiamna te chu hmasawnpui ngei turin a chah a. Thil zir leh chhiar chianna atan ni lo, mi sawisel nan chauh a ziak leh chhiar thiamna hman chu thil dik a ni lo tih hre reng turin a chah.

District Bawrsap chuan tunlai khawvel changkannain a ken tel Social Media atchilhna chu thalaite natna vei hlauhawm tak a nih thu sawiin Social Media aiin lehkhahu chhiar lama kir leh turin a chah a. Mi ten an hriatreng theihna turin zir laite chu thuril thuk tak haichhuak a, sulhnu hriatreng tlak hnutchhiah tum turin a chah bawk.

<><><>

## PC PARTY PR

PC Party chuan Mizoram sorkarin Minister leh Minister tlukpui mimal in cheina atana mipui sum cheng nuai 110 a hmang tawh a ti a, hei hi mipuite sum khawh ralna a an ngaih thu leh pawh an tih takzet thu an thuchhuah siamah an tarlang.

PC Party chuan Mizoram sorkar in hun rei tak sum harsatna a tawh thu tarlangin, ZPM chuan Sorkar hnathawk hlawh a hunah a pe thei lo a, Mizoram chung kawngpui te pawh a chhe hle a, Mizoram mipuiten a hun taka electric bill an pe chung pawhin sorkarin electric bill cheng vaibelchhe tel a ba reng a ni. Hetiang sum harsatna lak atanga Mizoram a chhuah theihnan sorkarin inrenchem a ngaih thu sawi reng siin mipui pawhin sum renchem zawnga sorkar hmalakna chu an thlawp lai leh sum hmuh belh tura mipui phur ti rit zawnga sorkar hmalakna pawh mipuiin an dodal phak loh lai a RTI hmanga Mizoram mipuiten Minister leh Minister tlukpui te In cheina atana mipui sum cheng nuai 110 lai hman a ni tih an hria chu PC Party chuan a zialo an tih takzet thu an tarlang.

PC Party thuchhuah ah chuan minister leh minister tlukpui, leh VIP thenkhat te bungalow leh quarter-ah chengin an chenna hmunte chu pawisa tam tak taka chei a nih bakah, bungalow emaw quarter pawha cheng lo Cabinet minister K Sapdanga, Pu Vanlalhlana, Pu Lalthansanga, Pu Vanlalhlana leh Pu PC Vanlalruata te chenna in cheng nuai 12 theuhva chei a ni an ti a, Minister of State Pu F Rodingliana, Pu B Lalchhanzova, Prof. Lalnilawma leh Pu Lalnghinglova Hmar te leh Adviser to CM Pu H Ginzalala te chhenna in pawh cheng nuai 10 theuva chei a ni a, incheina a vai a belh khawm hi cheng nuai 110 lai a tling tih sawiin, Mizoram sum dinhmun atanga thlirin a awm ang lo an tih hle thu an thuchhuah siamah hian an tarlang.

An thuchhuah a an danin Mizoram sum dinhmun that loh laia mahni inhaivur zawnga milian te an kal chuan Mizoram dinhmun a chhiat belh zel a,

chuvang chuan, mipui phur tih rit belhchhah zawnga sorkarin sum a tuak pawh mipuiin an dodal phal loh lai hian sum hnanna kawnga lo insum ve turin milian te an ngen tih an tarlang bawk.

<><><>

#### MIZORAM POLICE TRAINING

Mizoram Police hnuaiia Battalion hrang hrangte tana buatsaih, Chawlhkar thum awh tur, State Disaster Response Force Training chu vawiin khan 1st IR Battalion Headquarters Mualvum-ah hawn a ni.

He hun hawngtu Disaster Management & Rehabilitation Department Director Pu R Vanrengpuia chuan thusawiin, training tura thlan chhuah, Police te chuan an training neih turte phurrit a ngai lo turin a chah a, Mizoram chhungah chhياتna a lo thlenin, khawtlang mi tlawmngaite an tlan khawm thuai thin thu leh zir thiamna neilo tan chhياتna thlenna hmun chu a hlauhawm thin thu sawiin, fimkhur tak chungah chhياتna chungchanga zirna mumal tak neih a pawimawh thu a sawi bawk.

He hun kaihruaitu DM&R Department-a Joint Director (Operation) Pu Lalchunglura chuan Police te chu thunnunna tha tak hnuaiia awm an nih avangin chhanchhuah hna thawh a chak bik thu leh Battalion pali-ah Training zawh fel a ni tawh thu bakah hmachhawp an la neih thu a sawi a, DM&R Department Deputy Director Dr. Lalrokima Chenkual chuan 2010 atang khan Mizoram Police mi leh sa 800 hnenah Training an pek tawh thu te leh, chung an training pek tawh te atang chuan kum upat avang leh chhan dang avang te a chhanchhuahna hnathawh kawnga chak tawh tawh lo leh pension-a chhuak an tam tawh bakah mi 450 vel chauh Mizoramah hman theih an awm tawh thu sawiin, hemi avang hian nikum September thla atangin mi 188 dang training pe turin hma an lak tan thu a sawi.

Training-a tel Mizoram Police-te hi rikrum thila chhanchhuahna hna thawh dan bakah hliam sawngbawl dan te, tanpui ngai tanpui dan te; Damdawi hman dan te leh chhanchhuah hnathawhna hmanraw hman dan te Quick Response Team leh Adventure Sports lama tawn hriat nei ten ni thum chhung an zirtir hnu-ah, Nation Disaster Response Force lamin an zirtir chhunzawm dawn a ni.

<><><>

#### INTN'L TRADE EXPO

Serchhip -ah thla khat awh tur International Trade Expo chu vawiin khan Serchhip DC Pu Paul L.Khuma an hawng

Trade Expo hawngtu Serchhip Bawrhsap chuan Zorun Events te thahnemngaihna avanga India ram hmun hrang hrang atanga mipui mamawh lei tur tam tak Serchhipah chhawpchhuah a ni chu lawmawm a tih thu sawiin, a buatsaihtuten market zirchianna an neihnaah Serchhip mipuite chu mi fel leh inhawng tak, thawhpui nuam leh event lian tham buatsaih pawha hlawhtlinpui tham nia an hmuh avanga Expo neih nan an rawn thlang a ni, a ti.

Zorun Events buatsaih he Trade Expo ah hian state dang- Maharastra, Uttar Pradesh, West Bengal, Delhi leh a dangte atanga lo kalten dawr an

hawng a; Thenzawl leh Lunglei atangin dawr hawng an awm bawk a ni. Nilengin dawr theih an nih bakah zan dar 9 thleng Trade Expo hi hawn a ni.

<><><>

PM

Prime Minister Narendra Modia chuan vawiin khan New Delhi-ah Abu Dhabi Crown Prince Sheikh Khaled bin Mohamed bin Zayed Al Nahyan a kawm. Hruaitu pahnih hian India-UAE inkara thil pawimawh tak tak an sawi dun a, thawhdunna tur thil thar leh lian chho mekte an ngaihtuah bawk a ni.

Hruaitu pahnihte inbiak hnu hian inremna thuthlung panga ziah a ni a. Heng zingah hian Barakah Nuclear Power Plant hmalakna leh thawhhona turah Emirates Nuclear Energy Company leh Nuclear Power Cooperation of India Limited ten an ziak a. Abu Dhabi National Oil Company leh Indian Oil Corporation Limited ten LNG supply chungchangah inremna an ziak bawk a ni.

Vawiin chawhnu khan President Draupadi Murmu-i pawhin Abu Dhani Crown Prince hi Rastrapati Bhavan ah lengah a sawm a. Inkawmna hun tha tak an hmang dun a ni.

<><><>

SUPREME COURT

Supreme Court chuan Kolkata RG Kar Medical College and Hospital-a pawngsual leh inthahna thubuaiah Central Bureau of Investigation (CBI) chu report thar tun thla ni 17 hmaa thehlut turin a hriattir. Chief Justice of India D Y Chandrachud-a kaihhruai bench chuan CBI aiawha ding Solicitor General Tushar Mehta report thehluh chu uluk takin a zirchiang a. Hemi hnu hian kar khat chhunga report tharhlak thehlut leh turin bench chuan a hriattir ta a ni. He thubuai ngaihtuahtu bench-ah hian CJI bakah Justice J.B Pardiwala leh Manoj Misra te an thu a ni.

<><><>

J&K

Jammu & Kashmir-a Rajouri district-ah vawiin khan sipaiten firfiak pahnih an kaphlum. Sipaite hian Line of Control (LOC) kan ruk tum firfiakte hi an lo nangchin a. Hemi hnu hian inkap chhonzawm nghalin a hmunah firfiak pahnih an kaphlum a ni.

Sipaite chuan LOC chhehvelah hian firfiak dapchhuah beihpui ngawrh takin an thlak chhonzawm nghal a. Inkahna hmunah hian silai leh ralthuam dang engemawzat an man bawk a ni.

<><><>